

# Sheens kamapim strongpela tim

LONG statim dispela NRL sisen West Tigers kosa Tim Sheens i makim strongpela tim long pilai egensim St George Illawarra Dragons long opim NRL 2006 sisen long tumora nait long Telstra Stedum.

Dragons i wanpela strongpela tim long las yia we ol manmeri i ting bai winim 2005 primiaship taitol tasol ol i bin lus long han bilong ol Tigers long mesa semi fainol.

Dispela em i taim Dragons bai sekim sapos em i kisim inap strong long bekim dinau na wari bilong las yia.

Tasol maski long dispela Tigers kosa Tim Sheens i lukim pinis tingting bilong ol Dragons na em i sanapim pinis wanpela strongpela sait long makim ol Dragons.

Long statim dispela em i makim fulbek Brett Hodgson long kisim ples bilong hap bek Scott Prince olsem kepten.

Hodgson long kamap kepten i tok: "Em i bikpela samting tru long mi long kamap kepten bilong West Tigers. Mi lukluk tasol long mekim gut long dispela ples long taim bilong pilai na long stap ausait wantaim."

Na long lusim dispela sia Prince i tok: "Klab nau ken lukluk go het long wanem samting bai kamap," husat bai lusim ol Tigers na go joinim Kwinslen tim Gold Coast Titans long 2007 sisen.

"Em i bin hat tru long mi long kamap wantaim kain tingting tasol olgeta taim lewa bilong mi i save stap long Kwinslen na olsem mi mas go bek," Prince i tok.

Na long ol Dragons long redi long pait ol i kisim sampela nupela man long strongim sait bilong ol.

Ol i kisim Andrew Price na Matt Bickerstaff husat bai kamapim nupela primia pilai bilong ol long NRL kompetisen na Reece Simmonds husat bai ron long ol wing.

Na biknem pilai bilong ol Matt Cooper bai kamapim 100 NRL pilai bilong em taim em i kamap long tumora nait.

Ol tupela tim em Tigers: Brett Hodgson (c), Daniel Fitzhenry, Dean Collis, Paul Whatuira, Jamaal Lolesi, Benji Marshall, Scott Prince, Bryce Gibbs, Robbie Farah, John Skandalis, Anthony Laffranchi, Ben Galea na Liam Fulton. Senis em Michael Crockett, Keith Galloway, Ryan O'Hara na Todd Payten.

Dragons: Clint Greenshields, Reece Simmonds, Mark Gasnier,

Matt Cooper, Wes Naiqama, Trent Barrett (c), Ben Hornby, Luke Bailey, Dean Young, Jason Ryles, Corey Payne, Ashton Sims, Andrew Prince. Senis em Justin Poore, Michael Henderson, Matt Bickstaff na Aaron Gorrell.

Na long narapela gutpela pilai em tupela Kwinslen tim Brisben Broncos bai brukim bun wantaim Not Kwinslen Cowboys.

Long stat bikpela manki bilong ol Cowboys Carl Webb bai i no inap long pilai long bagarap long bodi bilong em.

Em i kisim bagarap long baksait bilong em bihain long wanpela trael pilai long tupela wiken i go pinis.

Tasol i gat sampela hait toktok olsem nogut em i kamap long wanem kosa Graham Murray i makim em long stap long Not Kwinslen Young Guns sait long pilai egensim Toowoomba long Kwinslen Kap keten reisa.

Wantaim em em 2003 Kwinslen Stet ov Orijin pilai Josh Hannay husat i kisim bagarap tu.

Long strongim sait bilong Murray em i makim fulbek Matt Bowen, winga Matt Sing, senta Ty Williams na Paul Bowman, faiv eit na 2005 Dally M Medol wina Jonathan Thurston, seken rowa Luke O'Donnell na kepten na lok Travis Norton.

Na long sait bilong ol Broncos em kosa Wayne Bennett lusim bikpela boi Brad Thorn na Corey Parker.

Wayne i mekim dispela ol senis long sait bilong husat i redi na husat i no redi. Em no lukluk tumas long sait bilong husat i gat nem long pilai o nogat.

Long lusim dispela tupela man em i kisim tupela nupela boi em Scott Minto na Leon Bott, David Stagg na Dane Carlaw em i makim tupela long seken ro na yanpela Steve Michael na Darius Boyd em i sanapim tupela long ol wing.

Boyd husat i Australia skulboi fulbek na husat i gat 18 krismas i bin stap long fullbek. Na Redcliffe paivot Shane Perry na ov sisen rikrut Michael Ennis na Ben Hannant em ol i mekim namba wan NRL pilai bilong ol. Brett Seymour bai kisim hap bek ples na Karmichael Hunt bai go bek na kisim ples bilong em long fulbek.

Kepten Lockyer na Carlaw bai kamap tu wantaim Webcke, Civonceva, Carroll, Berrigan na Hodges wantaim McGuire.